

Cheeti da Pawlo sa Wakolosaay Gimba guri giyaada

Kolosaay yaati yaamu guraa bara dari ilacindoo gu biraa waaree gu hhapee doó eteedine inkotii na Turuuki. Qatlay ya/abimiisay Pawlo giyaa ilii handikimi cheetiti yaa khiidimooge wana hhapee da Ruumige. (Yu'udii kitaabuu gu Yondu gu Ya/abimiisee 28:16-31.) Ina loi ya kahhi dawa yade yaamu gu Kolosaayge. Teesaaqay see, ina yaa arimi ilahufidu muuna gosii, sa gimba yaa akhasi tuba, yade kanisaage yaa wanta maarimamaa da afa'afuuma. Maarimamatee yaa kakaakanta sa hida gwaa /imbee Kristu tuba, inay kwanda gi ilakonee ou gu Wayahuudi da hinkaa gooay gu daba/u haa gu firoo da malayika. Inay teesaaqay laqiyee, ma muunaboo/eesiri Iliitleemu. Teesaaqay, Pawlo yaati handikimi cheetiti sa hida gwaa /imbee Kristu, ma hiislayri tuba, ti gwaa'araa da Kristu naa ilabu'unti inay. Kara, Kristu rawaa gu rawge wana tawaaliilina malayika, gieeri haa idadu goõ gu khoodotii waaree. Inkoo, inay kara hhanti ilakonay ou baku caacaahhamisu waku. Inay Kristu kilesi guni daareesiyee haa guni firiirinee. Slime, ina yaa kaay sa inay tuba, hiislayee ibinaa dooina kwanda gi laqante tuba, inay ti hida daa hiileehhi ha Iliitleemu.

Cehheemisu gu Pawlo

¹ Cheetiti yaa daqa doyi dahhada ana Pawlo, ya/abimiisay gu Kristu Yeesu hari sla'amuu gu Iliitleemu, sliimaa haa Timoteeyo hhia goori. ² Dandiray sanguti handikiikina unkuray hida gu Iliitleemu, hhiee koi gwaa

karahhasee /imbaraa dooguna ilagaasage ha Kristu, goó ibiidee yaamu gu Kolosaayge. Sangu qaye hhoínay gu didiru haa ibinaa da qasaw doó daqa Iliitleemu Taataa goori dahha.

Pawlo firoo da daareesoo

³ Balalu sliimaa hoóti kaawa /iisoo daqa Iliitleemuge, Taataa gu Looimoo goori gu Goó Yeesu Kristu, qatlay sangoó ilii firiirine unkuray. ⁴ Dandiray hoóti teesaaqay laqana, sa gimba haã akhasani gimba gu /imba dooguna ga kontee daqa Kristu Yeesu haa idoo ga ilii kontee sla'amuu daqa hida goó gu Iliitleemu. ⁵ /imba dooguna haa sla'amuu googuna yoóti yada dahhi musingi gu iliipa'aru sangwaa qaasi rawaa gu rawge. Unkuray haa akhasidiri waka'alee gimba gu iliipa'arukee, qatlay sangwaa ilii kakaami Gimba gu Hhou, ya/aboo da loi. ⁶ Gimbakee gu Hhou haroóti khay /aamu, slime yoótii qona khoodoo sliimaa giyaa iliiwane gooay daqa doogunay, tlaatleesa da balotiraa gaa ilii akhasidiri Gimbakee gu Hhou haa gi caahhadiri hhoínay gu didiru gu Iliitleemu, idoo gu ilii lou. ⁷ Epaafura tongimoo dana'a goori ga sla'ane naa caahhamisi unkuray Gimba gu Hhou. Ina ti yondimiisay daa /imbi gu Kristu, hari amoti yoóti iliia'ay unkuray. ⁸ Ina sandaa kaay dandiray gimba gu sla'amuu googuna sangwaa pihhi ha Muuna gu Iliitleemu.

⁹ Sa gimbaki tlaatleesi balotiraa gaa ilii akhasani gimba googuna, dandiray hoó maynaaba firiiriru sa unkuray. Dandiray firiirina Iliitleemu, ma sangu hadisi unkuray caahhamuu gosi goó daqa gimbaka'ay gi slaiye ina, hari amoo da hadisaraa waaway gosi goó, haa caahhamuu gu Muuna gosi. ¹⁰ Dandiray hati firiirina gimbaki, may dahhasidiri ibinaa ibidinaa daraa hiiboo/odi pandaa da Looimoo gu Gonge haa hagugi muuna boo/eesiday

amamu sliimaage. Slime, hay dahhasiday slawaraa /aamu gu hhou yondu sliimaa gu hhouge, haa gi ilaqinciday caahha Iliitleemu. ¹¹ Iliitleemu pihhiye /uuru sa unkuray hari hiidahhasa dosi da kooma wanqamee, may dahhasidiri hiikaasa idadu sliimaage ba/adaa see hhaki. ¹² Hari hha'aloo unkuray kaawa /iisoo daqa Taataage, hiif gwaa iliawu unkuray, ma slaydiri daqa da aalimee tla/aã gu hida daa tlinti'isi daqa Iliitleemuge tawaaloo da cenceege. ¹³ Ina hindaati ilabu'umi /uuru gu hanteego, hindigi looyisi haa hindigii guumisi dandiray tawaaloo da Nankosii gi slaiye. ¹⁴ Hari amoo da Nakee dandaa afiigweedi, haa hari amotee dandigi ilamooyimi tlakwaroo doori.

Kristu haa yondu gosi

¹⁵ Kristu ti laqaaqana pandataa, idoo Iliitleemu gi iliiwane, dugoómatibasli see arimaa. Ina na didiri idadu sliimaage. ¹⁶ Sa gimba hari amoo dosi, Iliitleemu yaa tleehhi idadu sliimaa gu waaree rawaa gu rawge haa kooroooge. Ina yaa tleehhi idadu doó arine haa doóba arimaa, gina idadu goó tawaalimeegoo rawge, baku hida gu deni gu koomee /uuru, watemi goõ baku hida goõ gu koomee kofiyayuu. Iliitleemu giyaati tleehhi idadu sliimaa hari amoo dosi sa ina. ¹⁷ Kristu yaati wana, daa ilii kahhiye tlehhinay idadu sliimaa. Kara, hari amoo dosi idadu sliimaa hingoóti ilaoooyayi daqa lenge. ¹⁸ Ina na saga gu slaqwa, doó eteedine kanisaa. Kara, ina na tlaatleesoo da slafimaa gu slaqwatee. Ina na tlaatleesoo, haa guni pandaa slafaraa ayisago, ina ma pandaa tleehhidi idadu sliimaage. ¹⁹ Sa gimba, Iliitleemu yaati slai hiigaamisu gosi goõ duguma arimi daqa Kristuge. ²⁰ Kara, hari amoo da Nankosi yaati slai ilagaamisu idadu goõ haa ina. Hari amoo da ceedee da Nankosi daa tuutuquti musalaabage,

Iliitleemu haraa khay qasaw daqa idadu gu khoodooge waaree haa idadu gu rawaa gu rawge waaree.

²¹ Waka'alee unkuray see haa segenge wantay haa Iliitleemu, yaati fa/ayaa dosi, sa gimba gu ilahudaa kokuna haa yondu googuna gu tlaku. ²² Teesaaqay see, inkoo Iliitleemu hanguu ilagaasi unkuray haa ina hari amoo da gwaa'araa da Kristu. Ina yaa teesaaqay laqi, manguraa khay pandaa dosi, tay kontaaiba tlakwaroo, dakoo ma ilawaasa lensee pandaa dosi. ²³ Inkoo, unkuray ilakooma ibinaa daa hii/atlidi /imbaraage, danguma may ringirin-qisa haa gi hhamisiday iliipa'arukira gaa slaydiri qatlay gaa ilii akhasidiri Gimba gu Hhou. Ana, Pawlo dinaati qaasi, ma yondimiisay gu kakaaru gu Gimba gu Hhou tleehhidi, daa kakaami daqa hida gu khoodoo sliimaage.

Pawlo yondu gosi kanisaa da Kolosaayge

²⁴ Inkoo, hoó hha'aluuda laba'asu goó slawe sa unkuray. Hari amoo da laba'asu gooi gu slaqwa, hoóti ilakooma slawa laba'asukira pahha gu Kristu. Laba'asukee koi ti sa slaqwa da Kristu, doó eteedine kanisaa dosi. ²⁵ Ana haati yondimiisay gu kanisaa tleehhidi, hari amoo da yondu sinaa taatahhi ha Iliitleemu sa unkuray. Ina yaati teesaaqay laqi, ana may gaasi kakaaru gimba gu Iliitleemu. ²⁶ Gimbaki na siiri giyaa yakwi tlaatleesa da waka'aleego haa tlaatleesa da laqwaloo gongo. Inkoo, Iliitleemu gingii tlaa'asi daqa hida kosii, ²⁷ slai hiitlaa'asa siiri da hindaqaruumaa da wanqamee dosi da didiri sa hida gu hhapapu goó. Siiritee, ti Kristu wa'ay kokunay, kara ina naroó khay iliipa'aru gu wanqamee da Iliitleemu.

²⁸ Dandiray, Kristu gunoó kakaana daqa hida sliimaa. Hoótii gadina haa hoóti caacaahhamisana hida sliimaa hari waaway goó, ma hiidahhasani hari khawa kila heedi pandaa da Iliitleemuge, tay hindii /atli ilagaasaraa haa

Kristu. ²⁹ Ti hari piimatee, ana Pawlo saganoó yondiida, hari maguuma hari /uuru gosi Kristu, hiĩ goó yondiida wa'ay koi.

2

¹ Ana sla'a unkuray ma caahhadiri, idoo goó ilii yondiide hari maguuma sa unkuray haa sa hida gwaa /imbee Yeesu gu yaamu gu Laodekiyaa, slime haa sa hida sliimaa gu kahhee arimaa ana. ² Ana haa yondiidi taqay, muunaĩ koina digima muuna hii/atlisi, haa digima ilagaasi sla'a-muuge. Ana sla'a inay ma caahhiri nara'a hindaqaruumaa da caahhamuu gu lou, ma caahhiri siiri da Iiitleemu. Siiritee ti Kristu loi. ³ Wa'ay kosii ina daganaa ilii yakwi kitangeeraru goō gu waaway haa caahhamuu.

⁴ Ana sanguti handikiikima gimbaki, heedi lensee ma hhanti hiicori unkuray hari gimba gu laalaagiru. ⁵ Hati kakaakama teesaaqay, sa gimba ana gamati segenge waari haa unkuray slaqwage, ana sliimaa waaraa haa unkuray muunage. Ana hoó hha'aluuda arimaa tuba, hoó ibitay hari amoo da hhoi, tay haã oodiri nara'a /imba dooguna daqa Kristuge.

Ibinaa daa bu'uti daqa Kristuge

⁶ Inkoo, idoo gwaa ilii /imbidiri gooy Kristu Yeesu tuba, ina ti Looimoo gu Goō tleehhidi, ilakooma ibinaa dooguna ilagaasaraage haa ina. ⁷ Unkuray slaw kibeeri daqa dosii, ina ma musingi googuna tleehhidi, haa gi qadimitay nara'a /imbage, dangwaa ilii caacaahhamisi gooy. Unkuray ilaqinca daareesa hari khisla.

⁸ Khu'uma heedi lensee hhanti tongee tleehhidisi unkuray hari somaa dosi da hiicoridu gu diitiray. Caacaahhamisukee guti ou gu hida gu kooroti kilesi, hiĩ guti Kristu gooba.

⁹ Sa gimba, hiigaamisu goõ gu Iliitleemu daqa slaqwa da Yeesu loi wana. ¹⁰ Unkuray see sangwaa hadisi ha Iliitleemu nama hiigaamisukee leẽ, ilagaasa doogunay haa Kristu. Ina na didiri daqa tawaaloo goõ haa /uuru goõ. ¹¹ Ilagaasateesii haa ina, unkuray dangwaa daba/i, ti hari daba/uka'aaba guri dabaiĩ gu hida, dangwaati daba/i ha Kristu. Kara, daba/ukee yaati afigweedi unkuray /uuru gu tlakwaroogo. ¹² Qatlay gwii nunqudimisuge, dangwaati qamidi pahha sliimaa haa Kristu hari bara da muunaiĩ. Kara, hiinunqudimisukeesii dangugi slafisi pahha ayisasugo sliimaa haa ina, sa gimba haa /imbidiri /uuru gu Iliitleemu, gwaa slafisu Yeesu yaagii ca/i ayis-ago.

¹³ Waka'alee unkuray yaati tuueenaa muunaiĩ kokunay, sa gimba gu tlakwaroo dooguna. Slime, unkuray hari amoo da muunaiĩ yaati hida daa daba/i ha Kristu. Inkoo, Iliitleemu sindaa qay dandiray slafimaa sliimaa haa Kristu, yaa ilamooyimi tlakwaroo doori goõ. ¹⁴ Iliitleemu yaa kwahhi cheeti daa handikimi iinanu koti haa sitaakaa daa qaditi hari bara doori. Ina giyaati baci sumuku hari amoo da hiitluhumisu rawaa gu musalaabage. ¹⁵ Hari amotee, Iliitleemu yaa afii/utli /uuru gu gieeri sliimaa, tawaaloo goõ haa /uuru goõ, ina gigi muriidisi pandaa da hidage. Kara, gigi dukhudukhumi hida daa afakhiidiidimi pahha dabaiĩ hari aluũ, gigi giyaadisi kaba/amuu gu hha'aloo dosii.

¹⁶ Inkoo, heedi lensee hhanti hukuna unkuray /agoo goó /agintee baku idadu giyoó kitahhantee, baku sa gimba gu losona waku baku losona gu hiica/araa da slehheẽ baku baloo da Sabaato. ¹⁷ Gimbakee sliimaa ti mahhatu gu gimba gumaa khawa. Teesaaqay see, gimba gu lou daqa Kristuge wana. ¹⁸ Unkuray hhanti /imbiday danguma hukumi ha heedi lensee, gungoo laqama hari

khooroo. Ina hingoótii duubi kilesi tuba, yaati murumu'u-udi hari amoo da afa'afuuma haa yoóti firiirina malayika. Heedi da hikee gooy, yoóti ilakona tletiru gosii haa hingoótii duubi ilahudaa kosii diitiray. ¹⁹ Kara, heedikee hingaati pasli daqa Kristugo, hiĩ gu saga gu slaqwa, doó eteedine kanisaa. Ilagaasaraa doorii haa Kristu, slaqwa goõ dagoóti /agimisi nara'a haa dagoóti lanuunu'usi sliimaa hari daqeemoo haa dambireera kosi, ina yoóti diirayda idoo doó iliislaiye gooy Iliitleemu.

²⁰ Unkuray haati kaka/adiri sliimaa haa Kristu haa dangugi afiigweedi daqa caacaahhamisu gu ou gu hida gu khoroti kilesi. Inkoo, soó so'oyi ibitay kara hida gu khoroti pahha? Unkuray dangugi /uureesi oowaraa amamu daa qaasi tuba, ²¹ “Hhanti ooday, hhanti koisiday /agoo, hhanti nangusiday idoti!” ²² Gimbakee sliimaa hiifaakoo dosi ti idadu gu tlakwaakwawee cirakiray lenge digoó ilii /agine, sa gimba idadu hhakee musingi gosi ti ilakaawa haa caacaahhamisu gu hida kilesi. ²³ Gu lou, caacaahhamisukee dugoóti arina ti kona pahha waaway hari amoo da firow giyaa qaasiri inay kilakoina, murumu'uuma da afa'afuuma haa tawaaliru slaqwa hari dihhay. Inkoo, hiidahhasiyaaiba tlaatlahhasa heedi, ma may hiigaasa slahhaahhaau gosi gu slaqwa.

3

Ibinaa da /abi daqa Kristuge

¹ Inkoo, bere dangwaa slafisi slafimaa gu /abige sliimaa haa Kristu, dabiida gimba gu rawaa gu rawge waara, Kristu daqa gi iliiwane, hiĩ ibiidi hari daba gu /uya gu Iliitleemu. ² Unkuray ilahudeesa gimba gu rawaa gu rawge waara, hhanti ilahudeesiday gimba gu khorotii waara. ³ Sa gimba, unkuray haati kaka/adiri, slafimaa kokuna digaa yakwi sliimaa haa Kristu daqa Iliitleemuge.

⁴ Qatlay Kristu dugumaa iliitlaa'asiye, ina gu kooma slafimaa kokuna, unkuray slime dangunimaa ilii tlaa'asi sliimaa haa ina wanqameege.

⁵ Inkoo, kwahha sumuku gimba goõ gu kooroti gu waara wa'ay kokunay, slipalauuma, slasla/iima, slahhaahhaau gu tlakwi, ilahudaa gu tlakwi, slahhaahhaau gu slawaraa khooslay wa/a, hiĩ gu nara'a haa firoo da sanaamu. ⁶ Sa gimba gu gimbakee, qupidaa gu Iliitleemu maati khayay daqa hida hhaka'ay gooba akhamisu Iliitleemu.*

⁷ Waka'alee, unkuray slime haati ibimaamitay teesaaqay tla/aã gooinay, dangugi tawaalimi ha gimbakee gu tlakwaroo. ⁸ Inkoo, unkuray kwanda ga kwahhadee segenge gimbaki sliimaa, slahhaa'amee, qupidaa, tlakwaroo, belendeqemisuu haa wahaaharu afaiĩ kokunaa. ⁹ Hangu hhanti ilii kakantay gimba gu afa'afuuma unkuray haa unkuray, sa gimba haa kwahhadiri sumuku amamu gu ibinaa dooguna da waka'alee sliimaa haa yondu gosi. ¹⁰ Ba/ay dangutii /abeesiye muunaiĩ kokunay haa ilahudaa kokunay, goó hii/abeesa caahhamuu, ilakhuukhu'usa haa ila'aa'aatisa dosi Iliitleemu, gwaa tleehhu ina. ¹¹ Ti'ii paslimisu hhaku kara tla/aã gu Yunaanimoo haa Yahuudimoo, heedi daa daba/i haa daaba daba/u, dahaa, haa heedi gwaa bawdu, tongee haa hhaã gu hhaki khiidimooge. Kristu na kaari daqa idadu sliimaage haa yoóti wana daqa hida sliimaage.

¹² Inkoo, sa gimba unkuray hanti hida daa hiileehhi ha Iliitleemu tleehhitiri, hida kosi doó slaiye, slaw muuna gu /awaariru, ibinaa da /abi da hhoi, murumu'uuma, qabidinoo, haa hiikaasa. ¹³ Unkuray hangu ilii kaasidee hangugi ilamooyiyintayi unkuray haa unkuray. Bere heedi leẽ tla/aã googunay kona sitaakaa lensee daqa dana'a gosii,

* 3:6 3:6 hida hhaka'ay gooba akhamisu Iliitleemu: Daqati hhaka handikaa da waka'aleege.

kwanda ina gi ilamooyine dana'a gosi. Unkuray kwanda ga ilamooyintee Looimoo gu Goõ gooay, idoo giyaa ilii ilamooyimi unkuray. ¹⁴ Hiicataraa da gimbakii sliimaa, hangu sla'aasla'adee unkuray haa unkuray. Sla'amuu noó ilagaasiyay nara'a hida goõ daqa lenge.

¹⁵ Qasaw doó /isine ha Kristu daqa doogunay tawaaline muunaiĩ kokunay. Unkuray dangwaatii leehhi ma ibitiri daqeemoo gu slaqwa leẽ pahha da kooma qasaw. Kara ti hida gu koomee /iisoo tleehhida. ¹⁶ Gimba gu Kristu ibiidiye wa/a wa'ay kokunay. Teesaaqay laqa, hangugi caacaahhamisiday haa hangugi ilii/oo/imintay hari waway sliimaa, tay toogunaa raa'aday raa'amu gu Daareesoo haa raa'amu waku gu daareesa Iliitleemu. Ina sugu raa'adee raa'amee hari muunaiĩ kokuna goõ. ¹⁷ Yondu sliimaa goó yonditee, gimati hari gimba goõ baku hari yondu, kwanda ga yonditee haa ga gimbuusidee gimba sliimaa hari uma gu Looimoo gu Goõ Yeesu. Teesaaqay laqa, tay toogunaa kaaday /iisoo daqa Iliitleemu Taataage hari amoo da yondu daa yondiidi ha Kristu sa unkuray.

Ilii/oo/imiru ibinaa da /abige

¹⁸ Unkuray tigay, muriida hhawatee kokuna, idoo daraa iliiboo/i gooay pandaa da Looimoo gu Gonge.

¹⁹ Unkuray hhawatee, sla'a tigay kokuna, hhanti kontay dihhay daqa dooinay.

²⁰ Unkuray daaqay, balalu sliimaa akhamisa ayiĩ haa amu kokuna gimba sliimaage. Teesaaqay laqa, sa gimba gimbaki yoó muunaboo/eesi Looimoo gu Goõ.

²¹ Unkuray ayiĩ, hhanti slahhaa'amisiday ya'ay kokuna, ba/atii simbarii gwaaiyay.

²² Unkuray tongee, akhamisa looe dooguna da ti'lii waaraa koorooge gimba sliimaage. Teesaaqay laqa ti qatlay giyoó iliiwane kilesiiba, mangu slairi. Unkuray

ba/ay ti akhamisakina hari muuna gu hhou, sa gimba goó muritee Looimoo gu Goõ. ²³ Idadu sliimaa giyoó yonditee, yondiida hari muunaiĩ kokuna sliimaa, hoóti yonditay pahha sa Looimoo gu Goõ, ti sa hida gooba. ²⁴ Slawaw tuba, Looimoo gu Goõ sangu hadisi sawaadii da aalimee giyoó qaasiye sa hida kosi. Kristu na Looimoo gu lou soó yonditee. ²⁵ Heedi goó yondiida tlakwaroo, dugumaa bui idoo giyaa ilii yondiidi tlakwaroo dosi, sa gimba Iliitleemu konaaba hiilehhidu.

4

¹ Unkuray looee, yondiida sa tongee dooguna gimba gu haaki haa guraa hiiboo/u, tay gi caahhaday tuba, unkuray see kontay Looimoo gu Goõ rawaa gu rawge.

Ilakaawa

² Ilakooma hari khisla firooge, gi guuliday firootesii, tay toogunaa kontay /iisoo daqa Iliitleemuge. ³ Slime sandi firintee dandiray see, Iliitleemu sandima afiiiooyimi amoo da kakaaru ya/aboo dosi, ma kakaani siiri da Kristu, dingii tlaa'asi ha Iliitleemu. Ti sa siiritee ana saganí khiidimooge waara. ⁴ Inkoo, sini firintee maga kakaami ya/abotee cencetaa, idoo daga iliislaiye gooay kakaaru. ⁵ Unkuray ibiida hari waaway pandaa da hida gu kahhee /imba Kristu, tay gi yonditay nara'a hari qatlay googuna sliimaa ga kontee. ⁶ Balalu sliimaa coco'omoo googuna kone hacimaa gu hhoinay gu didiru gu Iliitleemu, haa guraa hiiboo/u, ma caahhadiri, idoo garaa iliiboo/odiri ilaki/isa heedi.

Cehheemisu gu hiifaakoo

⁷ Tikiiko, hhia goori ga slae haa yondimiisay daa /imbi, haa tongimoo dana'a goy yondu gu Looimoo gu Gonge, ina sangumaa kaay unkuray gimba goy goõ. ⁸ Ina hagwaani ya/abi daqa doogunay, samati gimbaki leẽ unkuray ma

caahhadiri gimba goori haa ma dangu muuna hii/atlisi. ⁹ Ina yaa khakhaakhay sliimaa haa Onesimo, hhia goori ga sla'ane /imbaraage, hiĩ gaa /imbani haa ti yaamulooy gu Kolosaay. Inay sangu kaayay gimba sliimaa daa yondiidi ti'ii yaamu kotii.

¹⁰ Arisitaako gu khiidimooge waara sliimaa haa ana, dangwaani cehheemisi unkuray. Nama teesaaqay leē, dangwaani cehheemisi ha Maariko binaamu gu Bari-naaba. Unkuray haã slaydiri ilakaawa da gimba gu Maariko, bere maa khay daqa doogunay kwahasu-usakuna. ¹¹ Kara, unkuray dangwaani cehheemisi ha Yeesu doó eteedina slime na Yuusto. Hhakee kilesi na Wayahuudi daa /imbidi Kristu tla/aã gu yondimiisee danaee koi Tawaaloo da Iliitleemuge. Kara, inay hinaa ili-iyari hari khisla. ¹² Slime, unkuray dangwaani cehheemisi ha Epaafura, heedi gu yaamu kokuna haa tongimoo gu Kristu Yeesu. Balalu sliimaa hari maguuma yoóti firiirina sa unkuray tuba, ma qaditiri nara'a hii/atla da muunainge haa ma hiigaasidiri nara'a, gimba sliimaa Iliitleemu gi slaiye magu yonditiri. ¹³ Ana hiidahhasa ilatlawa ina tuba, yoó yondiidi hari maguuma sa unkuray haa sa hhiee gu yaamu gu Laodekiyaa haa Hierapooli. ¹⁴ Slime, dangwaani cehheemisi ha Luuka dareesimoo goori ga sla'ane haa Deema hhia goori. ¹⁵ Cehheemisa hhiee goó gu Laodekiyaa haa hhioo doori Nimufaa sliimaa haa hida gwaa /imbee Yeesu goó hiikurunkurimidee wa'ay gu mara gosii.

¹⁶ Qatlay cheetiti dangoó ilii hhe'esiye somaa daqa doogunay, lehhisakana slime dagama somaa kay kanisaa da Laodekiyaage. Slime unkuray see somima cheeti-tee daa kanisaa da Laodekiyaa dahha. ¹⁷ Arikiipo sugu kaadee tuba, kwanda gii gaasiye yondukira nara'a sugwaa taatahhi ha Looimoo gu Goó.

¹⁸ Ana, Pawlo handikiikima cehheemisuki hari daba goy loi. Slawaw tuba, ana khiidimooge waara. Hhoinay gu didiru gu Iiitleemu ibiidiye sliimaa haa unkuray.

Ila/imbidu Gu /abu hari Burungaisoo

Burunge: Ila/imbidu Gu /abu hari Burungaisoo (Bible)

copyright © 2019 Wycliffe Bible Translators, Inc.

Language: Burunge

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 28 May 2022

5fd9f69c-03b6-5343-85b8-5043bec70185